



想孵卵个鴨嫲

露水對寶臂个樹葉仔跌下來，鴨嫲看咁一下厥寶，翼底下該粒卵好得無打露。昨暗晡愛睡目前，但在寶項生咁一粒卵，該係厥第一粒，佢暢啊同卵揸歸暗晡，睡毋落覺。

臨天光，主人來園仔餵食朝。孵咁歸暗晡个鴨嫲，肚飢啊佇毋著，看啊著有食，走一路出，同卵留在寶項。佢正式餓啊淨顧食，覺著該卵在厥寶項毋會有麼个问题。

主人同飼料倒淨淨過後，就攞等飼料桶仔在園仔肚上上下下。遶到鴨寶，看著該鴨卵，毋盼得个講：「這鴨嫲還懶哦，生咁卵又毋孵，放在這打露，係拈歸來去過得，係在這土核就浪核咁。」等到鴨嫲食飽，歸到寶項愛孵卵該下，卵毋見核咁！佢懊躁啊緊喊：「係个卵呢？仰毋見核咁？仰結煞正好？」

脣口个鴨仔聽著，有人就同佢講，佢食朝該下，卵分主人拈走咁！跔等又有人話佢，孵卵無恁簡單，愛忍得得餓，做毋得見看著主人來餵就開寶，係無主人覺著卵無人孵，就會同佢拈走。

無幾久，鴨嫲又生過幾粒卵。這擺佢記得上回个經驗，主人來愛拈卵該下，佢就孵等又用嘴愛去嘴佢，主人看著恁仔就無同卵拈走。該幾日，天時還翕哦！一個臨暗仔，晡燼過後，大嫲雨落一路下。仔就會毋著个鴨嫲，一下仔暢啊走去水窟該搞。主人來看著該兜鴨卵在涿雨，就囑講：「這兜卵鴨嫲仰毋孵？放分雨涿，係拈歸來去加菜。」

等鴨嫲搞罇咁，走歸寶，佢又噉天噉地喊講厥卵毋見核咁！這時節，老鴨嫲就教佢：「卵做毋得涿著雨，浸著水、涿著兩個卵會壞核，毋出鴨子，主人同佢等拈走咁。」

過後，佢盡認真孵，主人來餵也好、落雨也好，一時半刻都毋行開。久久仔，佢會去搵該兜卵。看等卵，佢緊愾加幾日添，鴨子孵出來个樣仔，心肚感覺盡安慰。有一日半夜，大家都睡落覺咁！哪知得！一尾大蛇哥趕來，因等舌嫲，鴨嫲分佢嚇啊跳一路出，哪還顧得著該兜卵。天光後，大家看著鴨嫲頭磬磬仔在該緊噉，佢正講蛇哥个事情。

「係盡想愛自家孵一寶卵啊！」鴨嫲噉人講。有人跔等講：「係無，係等大家同你搵手尋地方做寶。」乜有人講：「愛尋一個蛇哥上毋得、主人毋會注意个地方。」

下後，大家在主人疊个磚截頂項做寶。有个人同愛換个毛綁下來，有个人去尋燥絲个樵草，做得搵手个人聚概都來咁！鴨嫲跔在該寶項，定定仔捋毛絨同寶臂个縫補起來，定班過後，佢生咁一寶卵。

佢記得老鴨嫲教个、佢記得自家个經驗，大家講安全个地方，佢共樣防等蛇哥來搶厥卵。係瘰咁，頓埕一下就好；係肚飢咁，寶臂有好吮就罔吮。佢正經盡想愛自家孵卵！

隻過月後，佢感覺著肚底有東西緊動，佢企起來看咁一下，該兜卵殼有一個細細个空。

「係个卵噉開來咁！係个卵噉開來咁！」佢暢啊緊撥翼，聲骸擲啊盡大、盡大个緊講。

作者：陳志寧

☆詞彙學習☆

【土核】tu` hed`：蛋壞掉。

【懊躁】au zau：惱怒。

【係無】he mo`：要不然。

【噉天噉地】ve tien` ve ti：大聲哭喊。

【噉】kieu`：撒嬌的要求。

【磚截】zon` jied`：磚塊。

【燥絲】zau` xi`：乾燥成條狀。

【樵草】ceu` co`：乾的草料。

【定班】tin ban`：所有事務都準備妥當。

【頓埕】dun` de`：稍微休息。